

ذكريات بتنزف صور

الورق بينزف دم

من الاشتياق

بيهرب من صوت نيات الحقيقة

لذة العمر اللي عدّى

هزت كيان الوتر

قصيدة بتلم وراها العيال

بتتحت دمنا

الوطن بيرتل الأوجاع

على أسماع البنات

الورقة ملت م الغزل

الروح ملت م البكا

يا كل الساهرين ف خريف تايه عننا

مابقاش يهمنا غير الأمل
خارج حدود المنطقة
خط القلم
أرواح ملايكة مجمعة
على صدر الولد
سهرت بنات الحور
ترش البخور ف السما
ملهمش ف الأسحار
وقت السحر
ع المصطبة
جاية وسايب شعرها
نقطة حنان على خصرها
بتعيد ف ترتيب اللي فات
حبات عنب على ظهر الزمن
كعب الوطن كعبل عيون الكمان

ما يقتش خايف م الفراق
رغم الشرف متفتحة
وكأنها صوت أدان ملهوش صلا
خارج حدود الفلسفة
الهدف إنك تكون جدع
هائهد أهرامات الودع بحلمنا
قلب هناك قلب هنا
قلب خارج م الحدود الممكنة
وصل عيون كل البشر
جايز سطور الحلم تعرف تلمنا
خلاص ما فيش حاجة من الذكريات
غير إنها
بتنزف صور